

UVODNA RIJEČ

EDITORIAL

Cijenjene kolegice i kolege,

Razmišljajući o tome šta napisati u uvodnim riječima *Geodetskog glasnika*, odlučio sam da napišem par riječi o studentima *Odsjeka za geodeziju Građevinskog fakulteta Univerziteta u Sarajevu*.

Od 08. do 13. maja 2014. godine u Budvi je održano takmičenje sportsko-edukativnog karaktera pod nazivom *Građevinijada*. Uspjesi mladih kolega sa *Odsjeka za geodeziju* bili su za svaku pohvalu i na ponos njihovih nastavnika. Zapaženi rezultati dokaz su da je *Odsjek za geodeziju Građevinskog fakulteta u Sarajevu* jedan od vodećih u regionu u smislu edukacije studenata. Više o njihovim uspjesima možete pročitati na stranicama ovog broja *Geodetskog glasnika*.

Dana 07.11.2014. godine započeo je 5. regionalni susret studenata geodezije u Sarajevu, pod nazivom *RGSM 2014*. Tokom četiri dana trajanja susreta (skup je trajao do 10.11.2014. godine) održana su brojna predavanja, radionice i vježbe. Prisutni su bili studenti iz Beograda, Ljubljane, Zagreba, Novog Sada, Skoplja, Banjaluke, Splita, kao i studenti iz Beča. Skup i druženje mladih geodeta u Sarajevu organizovala je *Asocijacija studenata Građevinskog fakulteta u Sarajevu*.

Otvaranju skupa prisustvovao je najuži dio rukovodstva Građevinskog fakulteta i Odsjeka za geodeziju, nastavnici Odsjeka za geodeziju, kao i predstavnici sponzora, od kojih svakako treba izdvojiti Federalnu upravu za geodetske i imovinsko pravne poslove.

Druženje naših studenata sa kolegama iz bližeg i daljeg okruženja daje mi nadu da dolaze bolja vremena za našu struku. Potrebno je da više saradujemo na svim nivoima, a mladi kao i uvijek prednjače u pozitivnim stremljenjima. Za njihovu saradnju nisu potrebni sporazumi i ugovori, oni se vode "osjećajima", a na osnovu broja prisutnih mladih kolega zadovoljstvo mi je da "osjećaju" da je geodeziji potrebna saradnja. Također mi je veoma drago da educiramo mlade naraštaje koji će biti oslobođeni negativne ratne zaostavštine, koja nas je sve skupa kočila tako dugo vremena. Kočila nas je upravo po pitanju saradnje. Oni nam daju pozitivan primjer kako treba nastaviti dalje. Ovo nije bio poziv na nešto što je dio prošlosti i nekadašnjeg "bratstva i jedinstva". Ovaj skup je poziv na međusobno uvažavanje, a za dobrobit svih nas i naše zajedničke geodetske struke. U to ime, hvala mladim kolegama, kojima želim puno uspjeha u životu i daljem radu!

Zahvaljujemo se svima koji su učestvovali u pripremi i izdavanju ovog broja *Geodetskog glasnika*, a naročito zahvalnost dugujemo kompanijama GeoWild d.o.o. Sarajevo, Geodet d.o.o. Sarajevo, Zedis d.o.o. Zenica i AMG d.o.o. Visoko, koje su sufinansiranjem pomogle štampanje časopisa.

Admir Mulahusić
Predsjednik SUGGSBiH